

চরণ ধরিতে দিয়ো গো আমারে, নিয়ো না, নিয়ো না সরায়ে—
 জীবন মরণ সুখ দুখ দিয়ে বক্ষে ধরিব জড়ায়ে ॥
 স্থূলিত শিথিল কামনার ভার বহিয়া বহিয়া ফিরি কত আর—
 নিজ হাতে তুমি গেঁথে নিয়ো হার, ফেলো না আমারে ছড়ায়ে ॥
 চিরপিপাসিত বাসনা বেদনা বাঁচাও তাহারে মারিয়া ।
 শেষ জয়ে যেন হয় সে বিজয়ী তোমারি কাছেতে হারিয়া ।
 বিকায়ে বিকায়ে দীন আপনারে পারি না ফিরিতে দুয়ারে দুয়ারে—
 তোমারি করিয়া নিয়ো গো আমারে বরণের মালা পরায়ে ॥

Parjaay: Puja, Taal: Ardha Jhaptaal, Raag: Bhairavi
 Visit www.geetabitan.com for notation and other detail